

## Pilihan Rasional: Minda Abdullah C.D., Pemimpin Komunis Melayu

(Rational Choice: The Mind of Abdullah C.D., a Malay Communist Leader)

KAMARUDDIN M. SAID

### ABSTRAK

*Abdullah C.D. ialah mantan Pengerusi, Parti Komunis Malaya (PKM) sejak 1968, dan pemimpin de facto Rejimen Ke-10, Tentera Pembebasan Rakyat Malaya di bawah parti berkenaan sejak 1949 hingga 1989. Minda beliau, iaitu gabungan pemikiran, kesedaran dan cita-cita peribadinya, dengan input ideologi Marxisme-Leninisme-Maoisme telah menjadi acuan kepimpinan dan tindakannya menerusi kegiatan bersenjata PKM selama empat dekad. Pemikiran, kesedaran dan impian politiknya ini terungkap dalam tiga jilid memoir beliau (2005, 2007, 2009). Bergantung kepada perubahan dalam persekitaran politik di Persekutuan Tanah Melayu dan politik dunia selama empat dekad itu, minda Abdullah C.D. boleh dianggap dipengaruhi oleh pilihan rasional ataupun dogmatisme ideologi. Pada mulanya, mindanya dipandu oleh pilihan rasional kerana keterlibatan beliau dalam PKM adalah dalam era gerakan nasionalisme menentang kolonialisme Inggeris sedang bersemarak di Persekutuan Tanah Melayu. Namun begitu, setelah Persekutuan Tanah Melayu mencapai kemerdekaannya pada 1957, dan gerakan PKM mengalami kemerosotannya, beliau sebagai komisar politik dan komander Rejimen Ke-10 telah berusaha mempergiatkan kembali gerakan perjuangan bersenjata rejimen tersebut. Hal ini terjadi kerana minda nasionalisnya telahpun terperangkap dalam dogmatisme Marxisme-Leninisme-Maoisme. Dogmatisme ideologi menjadi landasan kepada pilihan rasionalnya untuk meneruskan gerakan revolusioner bersenjata. Makalah ini bertujuan menyelami minda politik Abdullah C.D. menerusi analisis kandungan terhadap tiga jilid memoir beliau yang tersebut di atas. Isi minda Abdullah C.D. ditafsirkan berpandukan teori 'pilihan rasional' yang pernah diguna pakai oleh Theda Skocpol apabila menganalisis secara sosiologikal tentang revolusi sosial di Perancis, Russia dan China.*

*Kata kunci: Melayu, komunis, nasionalisme, pilihan rasional, Abdullah C.D.*

### ABSTRACT

*Abdullah C.D. was the former Chairman of Malayan Communist Party (MCP) since 1968 and the de facto leader of the 10th Regiment of the Malayan People Liberation Army under the said party since 1949 until 1989. His mind – a combination of his own thought, consciousness and ambition, and the political ideology of Marxism-Leninism-Maoism shaped his leadership and actions, which found expression in four decades of armed struggles. Abdullah C.D.'s political thought, consciousness and ambitions are explicitly expressed in three volumes of his memoirs (2005, 2007, 2009). Subjected to the changes of political scenarios at the national and international levels over the decades, Abdullah C.D.'s initial choice could be seen as a rational one given the fact that his involvement with the MCP coincided with the growth in the Federation of Malaya of political nationalism against British colonialism. However, when the Federation of Malaya achieved her independence in 1957, and the political influence of the MCP started to deteriorate, Abdullah C.D., as the political commissar and commander of the 10<sup>th</sup> Regiment, strove to reactivate the Regiment's armed struggle. This move was largely due to his dogmatic belief in the political ideology of Marxism-Leninism-Maoism, which, then, was his rational choice. Based on his memoirs, this article seeks to analyse Abdullah C.D.'s political mind within the framework of 'rational choice' as demonstrated by Theda Skocpol in her interpretation of the French, Russian and Chinese social revolution.*

*Keywords: Malays, communist, nationalism, rational choice, Abdullah C.D.*

### PENDAHULUAN

Zaman tercetusnya revolusi Marxist dan perang gerila yang dilancarkan oleh parti komunis di serata dunia, kini boleh dikatakan telah berakhir. Keruntuhan sistem pemerintahan di bawah parti komunis di Kesatuan Soviet pada 1991 adalah penanda penting tentang berakhirnya pengaruh ideologi Marxist-Leninis di seluruh dunia.

Ekoran tumbangannya rejim Kesatuan Soviet itu, sebahagian besar parti komunis di seluruh dunia dibubarkan, dan Parti Komunis Malaya (PKM) adalah salah satu daripadanya. Namun begitu, beberapa orang tokoh PKM, terutamanya tokoh komunis Melayu yang bergerak dalam Rejimen Ke-10, Tentera Pembebasan Nasional PKM, telah menulis dan menerbitkan memoir masing-masing. Tokoh PKM ini termasuklah Abdullah C.D., Rashid Maidin, Shamsiah

Fakeh dan Ibrahim Chik. Abdullah C.D. ialah pemimpin *de facto* Rejimen Ke-10 tersebut. Tulisan ini bertujuan khusus menyelami minda Abdullah C.D., daripada sudut pandangan sosiologi, menerusi penelitian isi kandungan memoirnya (Abdullah C.D. 2009).

## SOSIOLOGI MINDA

George Herbert Mead pernah menulis bahawa minda manusia ialah salah satu daripada fenomena sosial kerana minda terbentuk menerusi proses sosial, dan terlibat secara langsung dengan berbagai tahap dan lapisan interaksi sosial (Mead 1934: 133). Minda manusia terisi oleh berbagai nilai dan makna kehidupan yang ditimba daripada pengalaman sosial individu. Minda individu menjalin dan merangkumkan input lingkungan sosial dengan pilihan peribadi lalu mencetuskan tindakan individu berkenaan dalam kehidupannya. Oleh itu, minda sendiri individu adalah merupakan satu proses berterusan yang menghubungkan pilihan peribadi dengan berbagai input dari lingkungan sosial. Ini kerana minda merupakan kombinasi pemikiran, persepsi, ingatan, keinginan, dan imaginasi yang mengalami proses taakulan dalaman, lalu membentuk cetusan kesedaran dan intelek seseorang. Dengan itu minda seseorang itu sentiasa mengalami proses pembentukan kesedaran, rasional dan emosi yang berterusan (Zerubavel 1997).

Minda golongan revolusioner boleh dikatakan unik, terutamanya minda golongan revolusioner Marxist-Leninist yang bergiat bersama-sama parti komunis. Ini kerana minda komunis percaya, yakin dan berpegang kepada doktrin asas yang ditekankan dalam teori Marxsis-Leninis, iaitu revolusi anjuran parti komunis berupaya mencetuskan revolusi untuk menumbangkan rejim feodal dan sistem kapitalis yang menindas dan seterusnya berkemampuan melahirkan masyarakat tanpa kelas (*classless*), tanpa negara (*stateless*) di samping kekayaan negara boleh dihasilkan dan dimiliki secara adil dan saksama menerusi sistem komunal (Daniels 1989). Theda Skocpol dalam kebanyakan tulisannya mengenai revolusi sosial, menekankan bahawa kejayaan revolusi Marxist yang dilancarkan oleh parti komunis di Russia dan China, selain dibantu oleh keyakinan terhadap teori Marxist yang diguna pakai oleh parti komunis, juga banyak bergantung kepada ciri-ciri kehidupan masyarakat proleter dan agraria yang kesusahan yang menimbulkan kondisi yang sesuai untuk tercetusnya revolusi. Selain itu, sifat pemerintah (*state*) yang kejam turut bertindak sebagai ramuan yang cocok untuk mencetuskan kegelisahan massa, dan untuk menaruh harapan kepada kebaikan komunisme (Skocpol 1994). Dengan bantuan kuasa-kuasa luar yang bersimpati, kehadiran massa yang revolusioner, yang diperteguhkan oleh kewujudan psikologi radikal kerana kemelaratan hidup, dan kesedaran kelas tani-proleter yang tinggi berteraskan ajaran Marxisme, kumpulan revolusioner berpotensi

mencetuskan revolusi sosial. Secara umumnya, dalam keadaan yang serba tertekan, langkah mencetuskan revolusi merupakan satu 'pilihan rasional' kepada kelas proleter dan petani miskin di Perancis, Russia dan China (Skocpol 1979, 1994). Tulisan ini ingin meletakkan penelitian tentang minda pemimpin komunis Melayu tersebut dalam konteks 'pilihan rasional' ini dan cuba menyingkap inti pati kepada rasionaliti pemimpin komunis Melayu ini dalam perjuangan politik mereka.

## KOMUNISME DI TANAH MELAYU

Ideologi komunisme telah mula bertapak di Tanah Melayu sejak dekad 1920-an, terutamanya dalam kalangan segelintir anggota masyarakat Cina. Ideologi ini dibawa masuk ke Tanah Melayu oleh penghijrah daripada negeri China ketika itu. Komunisme diperkenalkan kepada segelintir aktivis politik Melayu oleh tokoh komunis Indonesia seperti Alimin, Tan Malaka, Hasanoesi, Moeso, Winanta, Boedisoejitro, Soebakat dan Sutan Perpatih (Ho Hui Ling 2004). Oleh itu, tidak menghairankan jika komunisme merupakan salah satu daripada beberapa aliran kesedaran dan pemikiran politik yang mempengaruhi pergerakan dan langgam kehidupan sebahagian daripada nasionalis Melayu dalam dekad 1940-an. Matlamat perjuangan mereka adalah untuk mengalahkan kuasa kolonial dan imperialisme, mendirikan sistem pemerintahan berdasarkan teori dan ideologi Marxisme-Leninisme dengan menguatkuasakan kaedah kepimpinan demokrasi terpusat, melancarkan agenda melahirkan masyarakat egalitarian-sosialis dan sebagainya.

Minda Abdullah C.D. yang dibincangkan dalam bab ini merujuk kepada aliran pemikiran dan tindakan yang tumbuh dan mempengaruhi pergerakan politik dan militer yang ditaja dan dipimpin oleh PKM sejak parti tersebut ditubuhkan pada 1930 hingga dibubarkan pada 1989. Sebagai sebuah parti komunis yang ditaja penubuhannya oleh Communist International dan dibantu oleh Parti Komunis China, sejak penubuhannya lagi, PKM berpegang kepada ideologi Marxisme-Leninisme, dan kemudiannya Maoisme.

Marxisme-Leninisme ialah teori dan falsafah mengenai sistem sosial yang dijadikan ideologi aliran utama, malah rasmi oleh kesemua parti komunis yang bekerjasama di bawah Communist International dalam dekad 1920-an dan 1930-an. Teras teori dan falsafah ini adalah pemikiran yang terpancar dalam tulisan Karl Marx dan Vladimir Lenin. Marxisme-Leninisme diangkat menjadi ideologi rasmi ketika Joseph Stalin memerintah Kesatuan Soviet (1922-1953) dan pada ketika itu juga memimpin organisasi komunis seluruh dunia ketika itu (Waller 1981).

Secara ringkas, ideologi Marxisme-Leninisme ini merupakan teori dan falsafah sistem sosial, politik dan ekonomi yang berteraskan inti pati pemikiran Karl Marx yang diperhalusi dan diangkat oleh Vladimir

Lenin, pemimpin Parti Komunis Russia yang memimpin Revolusi Oktober 1917 dan seterusnya memimpin Russia. Marxisme-Leninisme boleh dianggap sebagai pelaksanaan pragmatis berlandaskan teori dan falsafah Marx oleh Lenin. Dengan demikian, Marxisme-Leninisme menggabungkan teori dan praxis sosialisme-komunisme yang dijadikan model yang perlu pelajari dan dicontohi oleh kesemua parti komunis di seluruh dunia.

Marxisme ialah teori dan falsafah yang berteraskan beberapa perkara utama, seperti berikut:

1. Teori dialektika-materialisme yang menekankan kewujudan pertentangan kelas tertindas terhadap kelas penindas terutamanya dalam masyarakat feudal dan kapitalis.
2. Bahawa kapitalisme yang dibangunkan oleh kelas pemodal yang menimbun-tambah kekayaan dengan melakukan pemerasan terhadap kelas pekerja akan runtuh akibat penentangan kelas yang dilancarkan oleh kelas pekerja dengan sokongan kesatuan buruh.
3. Bahawa kelas pekerja berupaya melancarkan revolusi sosial dan meruntuhkan rejim kapitalis jika dipimpin oleh parti komunis.
4. Parti komunis berupaya memimpin kelas pekerja dan para petani untuk melahirkan masyarakat sosialis yang wujud di atas landasan falsafah kesamarataan ekonomi dan sosial.

Inti pati teori dan falsafah ini terkandung dalam buku kecil karya Marx, yang yang cukup terkenal, berjudul "Manifesto Komunis".

Sebagai pelengkap kepada teori dan falsafah sosial anjuran Marx, Lenin menyusun garis dan strategi perjuangan dan pelan tindakan Parti Komunis Russia untuk mencapai apa yang dianjurkan oleh Marx. Lenin menekankan peranan dan kekuatan Parti Komunis Russia untuk menggerakkan kebangkitan kelas pekerja di samping melancarkan revolusi komunis untuk menubuhkan kapitalisme dan imperialisme. Lenin menekankan teorinya bahawa imperialisme ialah tahap tertinggi yang telah dicapai oleh kapitalisme. Oleh itu, parti komunis perlu berhadapan dengan kedua-dua kapitalisme dan imperialisme (yang bermaksud apabila sebuah kuasa kapitalis menguasai dan menjajah negeri dan masyarakat lain atas kepentingan kelas pemodalnya) bagi menubuhkan kedua-duanya dan untuk melahirkan masyarakat sosialis dan komunis.

Sejak 1949, iaitu sejak Mao Zedong berjaya memimpin Parti Komunis China melancarkan revolusi bersenjata dan seterusnya menguasai pemerintahan negara China, hingga pada tarikh kematiannya pada 1976, pemikiran beliau telah ditambah kepada ideologi Marxisme-Leninisme. Oleh itu, ketika PKM melancarkan gerakan bersenjata menentang kekuasaan Jepun dan Inggeris, dan seterusnya berperang dengan kerajaan Persekutuan Tanah Melayu dan Malaysia, teori, falsafah dan strategi politik dan militer yang berteraskan Marxisme-Leninisme-Maoisme adalah ideologi yang

dijadikan prinsip dan panduan. Tidak dapat dinafikan bahawa PKM lebih intim dengan Maoism memandangkan bahawa sebahagian besar anggota PKM ialah berketurunan Cina, dan para pemimpin utamanya juga ialah orang berketurunan Cina. Chin Peng ialah pemimpin *de facto* PKM sejak 1943, selepas Lai Tek, pemimpin PKM waktu itu menghilangkan diri. Namun begitu, PKM telah menubuhkan satu rejimen tenteranya (daripada 12 Rejimen kesemuanya) yang dianggotai secara konsepnya oleh orang-orang Melayu (berasal daripada Tanah Melayu dan Patani) seperti Musa Ahmad, Shamsiah Fakeh dan suaminya, Ibrahim Mohamad, yang menjalankan tugas untuk PKM ketika bermastautin di Beijing. Oleh itu, tidak dapat dinafikan juga bahawa PKM mempunyai hubungan yang sangat rapat dengan Parti Komunis China.

Mao Zedong, Pengerusi Parti Komunis China, antara lain pernah menekankan bahawa kuasa (bagi Parti Komunis) tumbuh membesar daripada laras senjata. Oleh itu, beliau menekankan perlunya parti komunis berhadapan dengan situasi perang kerana peperangan ialah satu cara untuk menyelesaikan kontradiksi permusuhan yang dianggapnya tercetus di bawah kapitalisme, terutamanya kapitalisme kolonial dan imperialisme. Dalam konteks senario di Tanah Melayu dalam dekad 1940-an dan 1950-an, berdasarkan perspektif PKM, kontradiksi permusuhan ini tercetus kerana penjajahan Inggeris, penjajahan Jepun, penjajahan Inggeris sekali lagi (selepas tamat Perang Dunia Kedua), dan penubuhan kerajaan Persekutuan Tanah Melayu yang dianggapnya meneruskan kapitalisme warisan penjajah. Oleh itu, kuasa kolonial Jepun dan British, dan kerajaan Tanah Melayu yang merdeka perlu dilawan dengan menggunakan kekuatan senjata. Ternyata bahawa garis perjuangan Parti Komunis China dijadikan teladan oleh PKM, iaitu untuk merampas kuasa menggunakan laras senjata.

#### MEMOIR TOKOH MELAYU DALAM PKM

Sejak awal dekad ke-21, memoir beberapa tokoh penting Melayu dalam pergerakan PKM telah diterbitkan. Antaranya adalah buku *Memoir Shamsiah Fakeh: Dari AWAS ke Rejimen Ke-10* (2004), *Memoir Ibrahim Chik: Dari API ke Rejimen Ke-10* (2004), *Memoir Rashid Maidin: Daripada Perjuangan Bersenjata kepada Perdamaian* (2005) dan *Memoir Abdullah C.D.* (2009, paling panjang dan mengandungi tiga bahagian). Kesemua memoir ini diterbitkan di Malaysia. Sebelum memoir ini diterbitkan, buku Abdullah C.D. yang bertajuk *Perang Anti-British dan Perdamaian* (1998) telah terlebih dahulu terbit di Hong Kong. Selepas itu, mantan pemimpin utama Parti Komunis Malaya, iaitu Chin Peng (dalam kesemua memoir yang tersebut di atas ejaan namanya berubah menjadi Chen Ping) telah menerbitkan bukunya yang bertajuk *My Side of History* (2003) di Singapura.

Buku mengenai pergerakan Parti Komunis Malaya memang telah banyak diterbitkan sebelum 1989, iaitu sebelum PKM berdamai dengan kerajaan Thailand dan Malaysia, dan para pembaca dapat memahami latar belakang sosial, politik, ekonomi dan sebagainya yang merupakan latar belakang kepada kegiatan dan pergerakan mereka. Buku yang ditulis oleh Gene Z. Hanrahan (1971), Anthony Short (1975), Kho Kay Kim & Adnan Nawang (1984), Aloysius Chin (1995), C.F. Yong (1997), Raj (2000), Ho Hui Ling (2004), dan Mohamed Salleh Lamry (2006) memberikan gambaran umum berkaitan dengan gerakan PKM. Namun begitu, pembaca memoir ini berkesempatan memahami kisah perjuangan politik segelintir orang kanan pergerakan PKM dan dapat menyelami isi hati serta perunggu minda mereka. Ini kerana memoir tersebut ditulis oleh mereka tanpa merasakan perlu berselindung atau merahsiakan perincian kegiatan mereka yang telah berlalu.

PKM ditubuhkan pada 1930, melancarkan gerakan perang gerila berpandukan idologi Marxisme-Leninisme-Maoisme, melawan pemerintahan Jepun (1942-1945), menentang kuasa penjajah Inggeris serta sistem kapitalisme kolonial di Tanah Melayu (sejak 1946 hingga 1957), dan menentang pemerintahan Kerajaan Persekutuan Tanah Melayu yang merdeka sejak 1957. PKM telah menamatkan gerakan perang bersenjata pada 1989 menerusi perjanjian perdamaian dengan Kerajaan Malaysia dan Kerajaan Thailand.

#### MINDA ABDULLAH C.D.

Abdullah C.D., dilahirkan pada 1923 di Parit, Perak. Beliau ialah pemimpin *de facto* Rejimen Ke-10, PKM. Setelah Perjanjian Damai Hatyai 1989, beliau telah menghasilkan tiga bahagian memoirnya, iaitu *Memoir Abdullah C.D. (Bahagian Pertama): Zaman Pergerakan Sehingga 1948* (2005), *Memoir Abdullah C.D. (Bahagian Kedua): Penaja dan Pemimpin Rejimen Ke-10* (2008), dan *Memoir Abdullah C.D. (Bahagian Ketiga): Perjuangan di Sempadan dan Penamatan Terhormat* (2009). Memoir ini mengandungi cerita sebenar PKM daripada kaca mata pengasas dan pemimpin Rejimen Ke-10, PKM yang sebelum ini tidak diketahui oleh para pengkaji.

Abdullah C.D. merupakan seorang penulis yang prolific. Dalam dekad 1980-an, beliau menerbitkan lapar buah manuskrip hasil tulisan yang dimulakan sejak 1940-an lagi. Kesemua manuskrip ini diterbitkan oleh Pejabat Pembebasan, Rejimen Ke-10, PKM (juga disebut sebagai Jabatan Politik Rejimen Ke-10). Manuskrip tersebut seperti *Malaya pada Zaman Feudal* (1982), *Perkembangan Masyarakat Tanah Melayu dan Patriotisme* (1984), *Strategi Penjajah British untuk Menguasai Malaya* (1984), *Perang Patriotik dan Perang Tani Melayu Melawan Penjajah* (1984), *Perang Anti-British Hingga Kemerdekaan 1957* (1985), *Perang Patriotik dan Perang Revolusioner* (1988), *Sumbangan*

*Penting dan Sejarah yang Mulia* (1989), dan *Api Perang Berterbangan* (1989). Pada penghujung dekad 1990-an, dua buah buku hasil tulisan Abdullah C.D. telah diterbitkan oleh Nan Dao Publisher di Hong Kong, iaitu *Perang Anti-British dan Perdamaian* (1998), dan *Darurat dan Kemerdekaan: Memperingati 50 Tahun Darurat di Tanah Melayu* (1998).

Kesemua karyanya ini jelas menggambarkan bahawa Abdullah C.D. menggabungkan pengetahuannya tentang sejarah Tanah Melayu dengan sikap politik antikolonialnya, dan kemudiannya dengan ideologi Marxisme-Leninisme-Maoisme sebagai landasan perunggu minda politiknya yang kiri dan radikal. Beliau memimpin Rejimen Ke-10, Tentera Pembebasan Nasional Malaya (TPNM) sebagai satu pasukan tentera PKM, sejak penubuhannya pada 1949 hingga ke tahun 1989.

Kesedaran nasionalisme tumbuh dalam mindanya kerana dia memahami kisah perjuangan Datuk Maharaja Lela menentang kuasa kolonial di Perak, setelah Perjanjian Pangkor 1874 dipaksakan oleh Inggeris. Kisah pembunuhan J.W.W. Birch, iaitu Residen Inggeris pertama di Perak, oleh para pengikut Datuk Maharaja Lela, dan kemudiannya, setelah kuasa kolonial Inggeris menghukum Datuk Maharaja Lela dan para pengikutnya telah mencambahkan sikap antikolonialnya yang mendalam. Tidak lama selepas Kesatuan Melayu Muda (KMM) ditubuhkan oleh Ibrahim Yaacob pada 1938, Abdullah C.D. turut menganggotainya. KMM ialah sebuah pertubuhan politik beraliran 'kiri' (bukan Marxist-Leninist) yang ditubuhkan bertujuan menyatukan kekuatan politik Melayu menentang penjajahan Inggeris dan berjuang ke arah pembentukan Melayu Raya (gabungan Tanah Melayu dan Indonesia).

Abdullah C.D. mempelajari tentang politik dan nasionalisme daripada seorang pelarian aktivis politik daripada Indonesia (Pak Inu) yang meminjamkannya buku-buku karya aktivis politik kiri Indonesia, khususnya Tan Melaka, dan menghuraikan persoalan mengenai penjajahan dan kemerdekaan (Abdullah C.D. 2005: 18). Setelah itulah minatnya menyertai KMM tidak dapat dibendung lagi.

Walaupun KMM bergiat menentang penjajahan Inggeris, dan kemudiannya bekerjasama dengan kuasa Jepun untuk mengalahkan kuasa Inggeris, pada 1942 KMM telah diharamkan dan dibubarkan oleh kuasa Jepun di Tanah Melayu. Hal ini telah memulakan penentangan permusuhan golongan kiri terhadap pihak berkuasa Jepun. Abdullah C.D. telah menyertai Tentera Rakyat Malaya Menentang Jepun (Malayan People's Anti-Japanese Army, MPAJA) dan seterusnya diterima menjadi anggota PKM. Keyakinannya kepada garis perjuangan PKM mendorongnya untuk menceraikan isteri yang baru saja dikahwininya dan meninggalkan kampung halamannya. Menurut Abdullah C.D.:

Saya rasa revolusi yang dianjurkan oleh PKM mempunyai harapan yang cerah untuk merebut kemerdekaan. Tetapi anggota parti komunis masa itu kebanyakannya terdiri daripada



orang Tionghua. Orang Melayu yang telah sedar atau progresif menyertai KMM berjuang untuk kemerdekaan tanah air. Oleh itu saya rasa orang Melayu haruslah mencontohi orang Tionghua, bekerjasama melancarkan perjuangan untuk kemerdekaan seperti orang Indonesia yang bekerjasama melancarkan revolusi menentang Belanda. Kini orang komunis telah berjaya membangkitkan semangat revolusi di kalangan orang Tionghua. Saya berazam dalam diri untuk menyedarkan orang Melayu bangun berevolusi, berganding bahu dengan kaum-kaum lain untuk kemerdekaan.

Ketika inilah saya membuat keputusan untuk ikut serta dalam perjuangan melawan Jepun di bawah pimpinan PKM. Untuk cita-cita inilah saya menutup kedai dan menceraikan isteri, meninggalkan keluarga dan segala-galanya (Abdullah C.D. 2005: 43-44).

Pada Mei 1945, Abdullah C.D. diterima menjadi anggota PKM. Apabila kuasa Jepun dikalahkan pada Ogos 1945, golongan kiri Melayu telah menubuhkan Parti Kebangsaan Melayu Malaya (PKMM) di bawah pimpinan Mokhtaruddin Lasso (kemudiannya dipimpin oleh Dr. Burhanuddin Al-Helmi dan Ishak Haji Muhammad). Abdullah C.D. adalah wakil PKM yang menghadiri hampir setiap pertemuan anjuran PKMM, sehinggalah parti ini (PKMM) diharamkan oleh kuasa Inggeris pada 1948.

Sejak menyertai PKM, Abdullah C.D. memperlihatkan bakat kepimpinan yang memberangsangkan Chin Peng, iaitu pemimpin *de facto* PKM, dan memberikan kepercayaan kepadanya untuk menubuhkan sebuah rejimen tentera yang dikenali sebagai Rejimen Ke-10, Tentera Pembebasan Nasional Malaya di bawah PKM pada 1949. Sebagai komisar politik dan pemimpin Rejimen Ke-10, Abdullah C.D. memperlihatkan kebolehannya menyusun strategi pergerakan angkatan tenteranya serta menyusun barisan kepimpinan Rejimen Ke-10.

Dalam memoirnya bahagian pertama (2005), Abdullah C.D. menceritakan tentang kegiatannya dalam PKM sejak 1945 hingga 1948, iaitu ketika PKM bergerak bebas secara terbuka. Beliau adalah wakil PKM dalam mesyuarat anjuran PKMM. Dalam jangka masa ini, Abdullah C.D. menumpukan kegiatannya kepada usaha bekerjasama dengan PKMM dan membangunkan pengaruh dalam organisasi buruh, terutamanya di Perak dan Selangor, khususnya Kuala Lumpur. Dalam pergerakan buruh, Abdullah C.D. pernah menyandang jawatan Ketua Kesatuan Buruh Melayu Selangor, Ketua Kesatuan Buruh Melayu Malaya, dan Naib Pengerusi Pan Malayan Federation of Trade Unions (PMFTU), iaitu gabungan kesemua organisasi buruh di Tanah Melayu ketika itu. PMFTU turut diharamkan ketika pihak berkuasa kolonial Inggeris menguatkuasakan Undang-undang Darurat pada 1948.

Memoir ini juga menceritakan tentang skop kesedaran politik Abdullah C.D. yang luas dan bukan sahaja meliputi kegiatannya dalam Kesatuan Melayu Muda, Tentera Anti-Jepun Rakyat Malaya, Parti Komunis Malaya, Pertubuhan Kebangsaan Melayu Malaya, Kesatuan Buruh Melayu Selangor, Kesatuan Buruh Melayu Malaya, dan Pan

Malayan Federation of Trade Unions, beliau juga terlibat secara tidak langsung memberikan bantuan dan sokongan kepada pergerakan revolusi komunis di Vietnam dan Indonesia. Beliau juga terlibat secara langsung dengan penubuhan Sekolah Marxis Malaya untuk mengajar orang Melayu tentang Marxisme.

Pada 1955, setelah markas Rejimen Ke-10 selesai berpindah dan menetap di selatan Thailand, Abdullah C.D. telah melangsungkan perkahwinannya dengan seorang wanita Cina bernama Eng Ming Ching, yang menggunakan nama Melayu, iaitu Suriani binti Abdullah. Eng Ming Ching ialah anggota PKM sejak 1940 (ketika berusia 17 tahun), dan pernah berkahwin dengan seorang tokoh PKM bernama Lai Raifel yang kemudiannya terkorban di tangan tentera Jepun. Setelah berganding bahu menjalankan gerakan dalam PKM selama kira-kira sepuluh tahun, mereka menjadi suami isteri. Mereka berdua merupakan pasangan suami isteri yang sangat berkuasa dalam Rejimen Ke-10 PKM. Sebagai ketua Rejimen Ke-10, Abdullah C.D. menerima anggota PKM daripada keturunan Cina menganggotai rejimen tersebut asalkan mereka menggunakan nama samaran Melayu. Kisah ini disentuh dalam bahagian ketiga *Memoir Abdullah C.D.* (2009).

Abdullah C.D. banyak menceritakan tentang perselisihan pendapatnya dengan Musa Ahmad. Berbeza dengan hubungan intimnya dengan Rashid Maidin dan Ibrahim Chik; Abdullah C.D. menganggap Musa Ahmad sebagai anggota PKM yang menghalang usahanya (Abdullah C.D.) untuk memperteguhkan pergerakan Rejimen Ke-10 di selatan Thailand. Musa Ahmad seringkali tidak bersetuju dengan langkah yang ingin diambil oleh Abdullah C.D. Oleh itu, pada 1955, Abdullah C.D. membuat keputusan untuk menghantar Musa Ahmad dan isterinya belajar, berubat dan bertugas di Beijing (ini menunjukkan Rashid Maidin sangat berkuasa dalam PKM). Pada 1968, Jawatankuasa Pusat PKM telah membuat keputusan melucutkan semua jawatan Musa Ahmad dalam PKM, termasuklah jawatan Pengerusi PKM, kerana beliau telah mengkritik kepimpinan PKM, khususnya kepimpinan Abdullah C.D. dan Rashid Madin. Jawatan Pengerusi PKM itu telah diambil alih oleh Abdullah C.D. sendiri. Musa Ahmad dan isterinya tinggal di Beijing hingga pada tahun 1980. Pada tahun tersebut, mereka menyerah diri kepada kerajaan Malaysia dan dibawa pulang ke Kuala Lumpur pada 1981. Penyerahan diri Musa Ahmad dan isterinya telah menimbulkan kemarahan memuncak Abdullah C.D. dan Rashid Maidin. Sebagai pemimpin Rejimen Ke-10, mereka berdua mengeluarkan pernyataan akan kemarahan mereka dengan menggunakan bahasa paling kesat. Kata-kata kesat ini diulang berkali-kali dalam bahagian ketiga *Memoir Abdullah C.D.* (2009), iaitu:

1. Komplotan jahat Musa Ahmad dan tujuan reaksionernya ialah hendak merosaki usaha rakyat semua bangsa negara kita dan rakyat sedunia dalam menentang hegemonisme (ms. 149).

2. Tapi si pengkhianat Musa Ahmad dengan kejinya telah menghapuskan kenyataan sejarah ini, ia menyebarkan tohmah-tohmah liar, memfitnah parti kita kononnya mengikuti arahan Parti Komunis Tiongkok (ms. 151).
3. ...Si pengkhianat Musa Ahmad memutarbelitkan kenyataan dan memperelok-elokkan Kerajaan Kuala Lumpur pula (ms. 151).
4. Si pengkhianat Musa Ahmad dengan gila-gilaan menyerang perjuangan bersenjata revolusioner dan memfitnah secara keji Tentera Pembebasan Nasional sesuai dengan keperluan kaum hegemonisme Soviet-Vietnam (ms. 154).
5. Si pengkhianat Musa Ahmad memborak konon Perang Pembebasan Nasional Anti-British yang dilancarkan oleh rakyat negara kita bukan lanjutan perang-perang patriotik kaum tani dalam sejarah negara kita (ms. 154).
6. Si pengkhianat Musa Ahmad memfitnah bahawa “perjuangan bersenjata tidak mendapat sokongan rakyat”, DAN “perjuangan itu pasti akan gagal”, (ms. 155).
7. Si pengkhianat Musa Ahmad juga memfitnah puluhan ribu pahlawan bangsa yang dengan perwira menyumbangkan jiwa dan raga mereka yang berharga demi kemerdekaan tanah air dan pembebasan nasional sebagai berkorban tanpa makna (ms. 156).
8. Dengan niat jahat si pengkhianat Musa Ahmad mengatakan konon, dia ingin memujuk bekas rakan-rakan seperjuangannya dari Rejimen Sepuluh Tentera Pembebasan Nasional supaya menyerah diri mengikut jejak langkahnya. Ini adalah mimpi di siang hari bolong (ms. 157).
9. Perbuatan Musa Ahmad tersebut menunjukkan betapa pengecut dan hinanya dia (ms. 157).
10. Musa Ahmad telah mengkhianati parti dan menentang revolusi, tapi dia dengan muka papan berkata konon dia ingin menyelamatkan rakan-rakan seperjuangannya? Pengkhianat adalah anjing kepala buruk dan dinajiskan dan sampah sejarah (ms. 159).
11. Pengakuan Musa Ahmad penuh dengan dusta, hanya sedikit saja yang benar. Misalnya, kawan Abdullah C.D. pernah mendidik dia dan membawa dia ke dalam revolusi, itu memang benar. Tetapi Musa Ahmad berada dalam pasukan bersenjata hanya beberapa tahun saja, dia tidak pernah mengarahkan pertempuran, dia tidak memerhatikan perubahan ideologinya. Selama belajar di luar negeri, dia suka hidup bersenang-senang. Dalam suatu masa yang panjang, dia tidak mahu belajar dengan bersungguh-sungguh, lebih-lebih lagi dia tidak mahu mengubah ideologinya dengan dalih dia berpenyakitan. Justeru itu wataknya yang keji kian hari kian berkembang. Dia tidak berani dan enggan pulang ke tanah air untuk menyertai perjuangan bersenjata yang susah payah. Dalam tahun 1967-68,

kerana dia menganggap ada peluang terbuka baginya (ketika itu Abdullah C.D. terkena racun), maka dia pun muncul sebagai pelampau kiri dan melakukan kegiatan anti-parti dengan siasat bermuka dua untuk merampas pimpinan Jawatankuasa Pusat Parti. Ini mendedahkannya sebagai orang ambisius politik (ms. 164).

12. Rupa hodoh Musa Ahmad selaku orang ambisius yang bermuka dua mengalami satu proses pendedahan... Itulah seluruh proses kemerosotannya menjadi pengkhianat yang bermuka tembok (ms. 165).

Ini ialah bahasa kesat dan kasar yang diguna pakai oleh PKM sama seperti yang diguna pakai oleh pemimpin radikal dan revolusioner parti komunis seluruh dunia dalam dekad 50-an hingga penghujung 80-an. Ayat-ayat di atas ditulis oleh Abdullah C.D. dan Rashid Maidin pada Januari 1981. Ini adalah gaya bahasa yang dipelajari daripada koleksi ungkapan Pengerusi Parti Komunis China, Mao Zedong. Dalam bahagian ketiga *Memoir Abdullah C.D. (2009)*, Abdullah C.D. memuatkan sepenuhnya tulisannya yang mengkritik dan menghina Musa Ahmad. Dia tidak mahu berselindung sedikit pun tentang sikap bencinya terhadap Musa Ahmad yang dirasanya ingin merampas kepimpinan PKM daripadanya (ketika Abdullah C.D. menderita terkena racun pada 1967).

Dalam memoirnya yang sama Abdullah C.D. membayangkan kenapa PKM dapat bertahan lama meneruskan perang mereka terhadap kerajaan Malaysia. Ini kerana PKM tidak bermusuhan dengan kerajaan Thailand yang menyebabkan tentera Thai tidak sering menyerang pangkalan PKM di selatan negara tersebut. Katanya:

Kerajaan Thai dan tentera Thai bukan musuh kami. Polisi kami ialah tidak campur tangan urusan dalam negeri Thai. Tapi sebagai sebuah pasukan tentera yang sedang melancarkan perjuangan, kami memerlukan kawasan basis dan pangkalan untuk meneruskan perjuangan (Abdullah C.D. 2009: 225).

Tajuk kecil bahagian ketiga *Memoir Abdullah C.D. (2009)* ini berbunyi “Perjuangan di Sempadan dan Penamatan Terhormat”. Ini membayangkan apa yang terpendam teguh pada lubuk hatinya, iaitu beliau sebagai pemimpin penting Rejimen Ke-10 yang merasakan dirinya sangat berani dan tidak takut mati berjaya menamatkan perjuangannya secara terhormat. Beliau menyebutkan dalam memoirnya bahawa dialah yang mencadangkan kepada PKM supaya mencari satu cara baru untuk memulakan jalan perundingan dengan kerajaan Malaysia. Setelah dipersetujui oleh kumpulan pemimpin Rejimen Ke-10, beliau mencari jalan menghubungi Tun Ghafar Baba, Timbalan Perdana Menteri di bawah pentadbiran Perdana Menteri Dr. Mahathir ketika itu, sebagai orang tengah untuk mendamaikan PKM dengan kerajaan Malaysia. Akhirnya, perjanjian perdamaian tercapai dan ditandatangani oleh pihak PKM, kerajaan Malaysia dan kerajaan Thailand. Makna terakhirnya ialah

bahawa PKM tidak dikalahkan atau menyerah kalah. PKM menamatkan gerakan bersenjatanya secara terhormat. Itulah yang dinanti-nantikan oleh minda sekumpulan aktivis politik kiri yang radikal pada ketika itu, walaupun ideologi Marxisme-Leninisme, malah Maoisme yang diyakininya sekian lama itu sedang runtuh bertaburan pada penghujung dekad 1980-an itu.

#### 'PILIHAN RASIONAL' ATAU KEGANASAN?

Dari segi tanggapan teoritis, apabila arena bagi memperjuangkan nasionalisme aliran kiri, bagi mencapai kemerdekaan Tanah Melayu daripada cengkaman penjajah Inggeris telah tertutup (kerana berkuat kuasanya Undang-undang Darurat 1948), maka 'pilihan rasional' yang ada pada mereka ialah menyertai gerakan perang bersenjata bersama-sama PKM. Ini kerana, kepada minda nasionalis Melayu pada ketika itu, kuasa kolonial perlu dan mungkin boleh ditumbangkan secara kekerasan, memandangkan kuasa Inggeris telah pun dikalahkan oleh Jepun antara 1942 hingga 1945. Rasionaliti ini sah selagi kolonialisme Inggeris berterusan. Namun demikian, antara 1948 hingga 1957 (tarikh kemerdekaan Tanah Melayu), PKM lebih dikenali sebagai kumpulan yang mencetuskan keganasan terhadap orang awam dan tidak sebagai pejuang kemerdekaan. Oleh itu, walaupun kondisi yang sesuai untuk mencetuskan revolusi telah wujud, namun kondisi tersebut tidak disambut oleh penduduk yang berbilang kaum sebagai pilihan rasional mereka untuk memerdekakan Tanah Melayu. Ketika itu, bagi orang-orang Cina yang berhaluan kiri dan radikal, pilihan rasional mereka ialah untuk menyokong gerakan Parti Komunis China pimpinan Mao Zedong. Mereka menyokong PKM kerana tanggapan bahawa PKM ialah penyokong kuat Parti Komunis China. Bagi aktivis politik aliran kiri Melayu ketika itu, bekerjasama dengan Parti Komunis China bukanlah merupakan satu pilihan yang rasional. Pilihan rasional mereka ialah bekerjasama dengan Parti Komunis Indonesia. Tetapi, apabila Tanah Melayu diberikan kemerdekaan oleh British pada 1957, PKM kehilangan gagasan 'pilihan rasional' pramerdekanya itu. Oleh itu, PKM mengguna pakai konsep Tanah Melayu 'merdeka tidak sepenuhnya' sebagai rasionaliti untuk meneruskan perjuangan bersenjata mereka. Namun begitu, sokongan orang Melayu terhadap PKM sangatlah kecil. Pada masa yang sama, imej PKM sebagai penganas yang menyusahkan kehidupan rakyat menjadi sangat ketara.

Banyak kajian dilakukan dan buku diterbitkan yang menceritakan tentang keganasan yang dilakukan oleh anggota PKM di Tanah Melayu pada zaman Undang-Undang Darurat dikuatkuasakan, iaitu antara 1948 hingga 1960 (Raj 2000; Ho Hui Ling 2004). Selain menyerang pegawai polis dan tentera termasuk menyerang hendap pasukan tentera kerajaan, anggota PKM turut menyerang orang awam, terutamanya masyarakat Cina. Ho Hui Ling

(2004) menceritakan hal ini dengan panjang lebar, iaitu bagaimana angkara anggota PKM menimbulkan huru-hara di seluruh Tanah Melayu dan menghantui orang awam kesemua kaum, termasuklah Orang Asli. Orang awam diserang kerana keengganan mereka menyokong dan memberikan bantuan kepada perjuangan PKM, ataupun kerana mereka dikenal pasti sebagai orang yang dimusuhi oleh PKM. Kesengsaraan hidup orang awam pada zaman Darurat telah sekian banyak diperkatakan dan tidak perlu diulang di sini. Kesengsaraan ini bertimpa-timpa kerana perbuatan PKM dan kerana langkah membasmi PKM, terutamanya oleh pihak berkuasa kolonial. Namun begitu, Shamsiah dan Abdullah C.D. sedikit pun tidak menyentuh tentang perkara ini dalam memoir masing-masing. Malah, beliau menekankan betapa tidak sesuainya jika dia digelar 'penganas komunis.' Beliau begitu beria-ia menekankan bahawa dia adalah nasionalis yang berjuang mengangkat senjata menentang kuasa kolonial Inggeris. Beliau tidak sedikit pun memohon maaf kerana mencetuskan kesengsaraan kepada orang awam di Tanah Melayu, terutamanya pada zaman Darurat.

Abdullah C.D. ialah seorang peminat sejarah yang bercita-cita meneruskan perjuangan para pahlawan Melayu terdahulu, sejak Datuk Maharaja Lela dan Datuk Bahaman lagi, yang menentang kuasa kolonial. Beliau ialah seorang penulis yang prolifik. Beliau diterima menjadi anggota PKM tanpa perlu menjalani latihan sekolah PKM. Disebabkan kebolehnya mengetahui kumpulan bersenjata, Chin Peng menyarankan supaya beliau menubuhkan Rejimen Ke-10. Beliau juga ialah seorang ideolog komunis Melayu dan berupaya melaksanakan visi politiknya kerana beliau berjawatan komisar bagi Rejimen Ke-10. Beliau juga mengarahkan pergerakan Tentera Pembebasan Nasional PKM. Apabila beliau terkena racun (1967), ramai anggota PKM yang disyaki menjadi ejen pihak kerajaan Malaysia telah dibunuh. Apabila beliau dikritik oleh kumpulan Musa Ahmad, beliau mengambil tindakan memecat Musa daripada segala jawatan yang dipegang dalam PKM, termasuklah sebagai Pengerusi PKM. Dalam memoirnya, kerana beliau berkuasa (sebagai komisar dan juga sebagai Pengerusi PKM menggantikan Musa Ahmad), Abdullah C.D. mendedahkan segala-galanya, termasuklah gambar kesemua anggota Rejimen Ke-10 yang dipimpinya. Beliau ternyata seorang yang cekap menjalankan tugasnya sebagai pemimpin sebuah organisasi penganas selama empat dekad. Dalam memoirnya, beliau juga tidak meminta maaf kerana melakukan keganasan dan pembunuhan terhadap orang awam. Malah, beliau juga menuntut perjuangannya dihargai. Menurutnya, tanpa keberanian PKM bermandi darah, Tanah Melayu tidak akan diberikan kemerdekaan oleh Inggeris. Setelah ditandatangani Perjanjian Haadyai 1989, beliau tidak berhasrat tinggal menetap di Malaysia kerana takut dipenjarakan di bawah Akta Keselamatan Dalam Negeri Malaysia. Abdullah C.D. juga tidak menyentuh sedikit pun tentang krisis yang melanda komunisme sejak



tumbangnya rejim komunis di Kesatuan Soviet. Malah, beliau tidak memberikan sebarang komen mengenai Malaysia yang pesat membangun sejak mencapai kemerdekaannya pada 1957.

#### PENUTUP

Teori 'pilihan rasional' mungkin boleh diguna pakai untuk memahami sebab-musabab terdapat para nasionalis Melayu dalam dekad 1940-an dan 1950-an mengambil keputusan menyertai gerakan PKM. Menurut Abdullah C.D., kerana beliau tidak mempunyai pilihan lain, kecuali jika rela dipenjarakan. Apabila Tanah Melayu mencapai kemerdekaannya, pilihan rasional untuk meneruskan perjuangan bersama-sama PKM adalah atas alasan Tanah Melayu belum merdeka sepenuhnya (hanya merupakan sebuah neokoloni British) dan PKM yang akan menjadikannya sebuah negara yang merdeka sepenuhnya. Apabila Malaysia muncul menjadi sebuah negara yang pesat membangun, rasional yang digunakan meneruskan perjuangan bersama-sama PKM adalah kerana Malaysia terus-menerus dicengkam oleh modal asing (yang dibenci oleh Mao Zedong dalam era Revolusi Kebudayaan di negeri China). Akhirnya, komunisme mula mengalami krisis dalaman sejak awal dekad 1980-an, dan PKM juga telah kehilangan pilihan rasionalnya untuk meneruskan perjuangan.

Sebenarnya, idea memulakan rundingan antara PKM dengan kerajaan Malaysia dan kerajaan Thailand bermula pada 1988 setelah pengaruh Mao Zedong mulai terhakis di negeri China yang menyebabkan PKM tidak lagi mempunyai penaung politik yang kuat. Mao Zedong meninggal dunia pada 1976 dan tempatnya sebagai pemimpin utama China telah diisi oleh Deng Xioping. Beliau mengubah dasar ekonomi dan sosial negeri China yang telah dikuatkuasakan oleh Mao Zedong, terutamanya dasar pembangunan ekonomi berdasarkan sistem komun (1958-1961) yang menyebabkan penduduk China mengalami kebuluran, dan dasar yang berkaitan dengan Revolusi Kebudayaan yang telah memecahbelahkan organisasi Parti Komunis China dan keharmonian sosial di negeri tersebut. Deng berpendirian bahawa unsur ekonomi pasaran yang dianggap tidak menggugat prinsip sosialisme boleh diterima dan diamalkan di negeri China. Kemungkinan besar bahawa Deng tidak lagi memberikan bantuan kewangan dan sokongan moral yang diperlukan oleh PKM. Hal ini tidak disentuh dalam *Memoir Abdullah C.D.* (2005, 2008, 2009).

Proses keruntuhan rejim komunis di Kesatuan Soviet dan luntarnya ketaksuban umum terhadap Marxisme-Leninisme-Maoisme terjadi di sepanjang dekad 1980-an. Pada penghujung dekad 1980-an itu, China mulai mengiktiraf unsur positif dalam sistem kapitalisme. Negara-negara bekas tanah jajahan, termasuklah Malaysia telah memperlihat kejayaan dalam program pembangunannya di bawah kapitalisme. Kesemua itu

telah dilihat sendiri oleh Abdullah C.D. Dalam jangka masa itu juga, PKM telah berpecah tiga, kesan daripada revisionisme terhadap Marxisme-Leninisme. Inilah faktor yang membawa mereka ke meja perundingan dengan kerajaan Malaysia dengan bantuan kerajaan Thailand pada 1989.

Bertitik tolak daripada idea Theda Skocpol bahawa revolusi sosial berjaya tercetus di Perancis, Russia dan China kerana terdapat pilihan rasional yang jelas dan berjangka panjang dalam kalangan rakyat ketiga-tiga negara tersebut, dan disertai oleh wujudnya kondisi yang cocok untuk tercetusnya revolusi. Bagi revolusi komunis yang ingin dicetuskan oleh PKM di Tanah Melayu, pilihan rasional ke arah itu hanya muncul sebentar sahaja (1948-1957). Walau bagaimanapun, kondisi kehidupan yang melarat yang boleh mencetuskan revolusi sosial tidak terlalu meruncing, menyebabkan PKM tidak mendapat sokongan daripada majoriti rakyat berbilang kaum di Tanah Melayu. Malah, kemelamatan hidup rakyat berbilang kaum di Tanah Melayu, khususnya dalam zaman Darurat, adalah disebabkan oleh keganasan yang dilandakan oleh PKM. Hal ini nyata enggan disentuh oleh minda pemimpin komunis Melayu. Kejayaan kerajaan Malaysia melaksanakan pembangunan nasional, khususnya dalam dekad 1980-an, iaitu ketika komunisme di seluruh dunia menghadapi krisis dalamannya, telah mendorong PKM untuk merundingkan perdamaannya dengan pihak kerajaan Malaysia. Berdamai tanpa terpaksa mengaku kalah ialah pilihan rasional PKM ketika itu.

#### RUJUKAN

- Abdullah C.D. 2005. *Memoir Abdullah C.D. (Bahagian Pertama): Zaman Pergerakan Sehingga 1948*. Petaling Jaya: SIRD.
- Abdullah C.D. 2007. *Memoir Abdullah C.D. (Bahagian Kedua): Penaja dan Pemimpin Rejimen ke-10*. Petaling Jaya: SIRD.
- Abdullah C.D. 2009. *Memoir Abdullah C.D. (Bahagian Ketiga): Perjuangan di Sempadan dan Penamatan Terhormat*. Petaling Jaya: SIRD.
- Aloysius Chin. 1995. *The Communist Party of Malaya: The Inside Story*. Kuala Lumpur: Vinpress.
- Daniels, R.V. 1989. *Year of the Heroic Guerrilla: World Revolution and Counterrevolution in 1968*. New York: Basic Books.
- Hanrahan, Gene Z. 1971. *The Communist Struggle in Malaya*. Kuala Lumpur: University of Malaya Press.
- Ho Hui Ling. 2004. *Darurat 1948-1960: Keadaan Sosial di Tanah Melayu*. Kuala Lumpur: Penerbit Universiti Malaya.
- Ibrahim Chik. 2004. *Memoir Ibrahim Chik: Dari API ke Rejimen Ke-10*. Bangi: Penerbit Universiti Kebangsaan Malaysia.
- Khoo Kay Kim & Adnan Nawang, pnyt. 1984. *Darurat 1948-1960*. Kuala Lumpur: Muzium Angkatan Tentera Malaysia.
- Mead, George, H. 1934. *Mind, Self and Society*. Chicago: University of Chicago Press.



- Mohamed Salleh Lamry. 2006. *Gerakan Kiri Melayu dalam Perjuangan Kemerdekaan*. Bangi: Penerbit Universiti Kebangsaan Malaysia.
- Raj, Dato' J.J. 2000. *The War Years & After*. Subang Jaya: Pelanduk Publications.
- Rashid Maidin. 2005. *Memoir Rashid Maidin: Daripada Perjuangan Bersenjata kepada Perdamaian*. Petaling Jaya: SIRD.
- Shamsiah Fakeh. 2004. *Memoir Shamsiah Fakeh: Dari AWAS ke Rejimen Ke-10*. Bangi: Penerbit Universiti Kebangsaan Malaysia.
- Short, Anthony. 1975. *The Communist Insurrection in Malaya 1948-1960*. London: Frederick Muller Ltd.
- Skocpol, Theda. 1994. *Social Revolutions in the Modern World*. New York: Cambridge University Press.
- Skocpol, Theda. 1979. *States and Social Revolutions: A Comparative Analysis of France, Russia, and China*. New York: Cambridge University Press.
- Stubbs, Richard. 1989. *Hearts and Minds in Guerrilla Warfare: The Malayan Emergency 1948-1960*. Singapore: Oxford University Press.
- Waller, M. 1981. *Democratic Centralism: An Historical Commentary*. Manchester: Manchester University Press.
- Yong C.F. 1997. *The Origins of Malayan Communism*. Singapore: South Sea Society.
- Zerubavel, E. 1999. *Social Mindscapes: An Invitation to Cognitive Sociology*. Harvard: Harvard University Press.
- Kamaruddin M. Said, Ph.D  
Pusat Pengajian Sosial  
Pembangunan dan Persekitaran  
Fakulti Sains Sosial & Kemanusiaan  
Universiti Kebangsaan Malaysia  
43600 UKM, Bangi  
Selangor  
kms1988@ukm.my